

# 佛说弥勒成佛經

姚秦三藏法師鳩摩羅什 譯



南無本師釋迦牟尼佛

## 說明

本繁體校正版《佛说彌勒成佛經》電子書，根據《乾隆大藏經》大乘五大部外重譯經，第 0205 部，姚秦三藏法師鳩摩羅什譯《佛说彌勒成佛經》影印本校正，句讀僅供參考。

本電子書是免費結緣品，特此說明。

仁慧草堂

二〇一九年二月



掃碼關注仁慧草堂微信公眾號

## ●起誦儀

### 香讚

(一編)

爐香乍爇. 法界蒙薰. 諸佛海會悉遙聞. 隨處結  
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

### 淨口業真言

(三編)

唵. 修唎. 修唎. 摩訶修唎. 修修唎. 薩婆訶.

### 淨三業真言

(三編)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

### 安土地真言

(三編)

南無三滿多. 母馱喃. 唵. 度嚕度嚕. 地尾. 娑婆訶

### 普供養真言

(三編)

唵. 誚誚曩. 三婆嚩. 禳日囉斛.

南無本師釋迦牟尼佛（合掌三稱）

開經偈

（一編）

無上甚深微妙法 百千萬劫難遭遇  
我今見聞得受持 願解如來真實義

# 佛說彌勒成佛經<sup>1</sup>

姚秦三藏法師鳩摩羅什 譯<sup>2</sup>

如是我聞：

一時，佛住摩伽陀國遊波沙山<sup>3</sup>，過去諸佛常降魔處，夏安居中，與舍利弗經行山頂，而說偈言：

一心善諦聽 光明大三昧  
無比功德人 正爾當出世  
彼人說妙法 皆悉<sup>4</sup>得充足  
如渴飲甘露 疾至解脫道

時，四部眾平治道路，掃灑<sup>5</sup>燒香，皆悉來集，持諸供具，供養如來及比丘僧。諦觀如來，喻如孝子視於慈父，如渴思飲，愛念法父亦復如是。各各同心，欲請法王轉正法輪，諸根不動，心心相次，流住<sup>6</sup>向佛。是時，比丘、比丘尼、優婆塞、優婆夷、天、龍、鬼神、乾闥婆、阿修羅、迦樓羅、緊那羅、摩睺羅伽、人、非人等，

<sup>1</sup> 大正藏：佛說彌勒大成佛經

<sup>2</sup> 大正藏：姚秦龜茲國三藏藏鳩摩羅什譯

<sup>3</sup> 大正藏：波沙山（孤絕山也）；永樂北藏及龍藏：遊波沙山

<sup>4</sup> 大正藏：悉皆；永樂北藏及龍藏：皆悉

<sup>5</sup> 大正藏：灑掃；永樂北藏及龍藏：掃灑

<sup>6</sup> 大正藏：注

各從坐起，右繞世尊，五體投地，向佛泣淚。

爾時，大智舍利弗齊整衣服，偏袒右肩，知法王心，善能隨順，學佛法王，轉正法輪，是佛輔臣，持法大將，憐愍眾生故，欲令脫苦縛，白佛言：「世尊！如來向者於山頂上說偈，讚歎第一智人，前後經中之所未說。此諸大眾，心皆渴仰，淚如盛雨，欲聞如來說未來佛，開甘露道。彌勒名字、功德、神力、國土莊嚴，以何善根？何戒？何施？何定？何慧？何等智力得見彌勒？於何心中修八正路？」

舍利弗發此問時，百千天子、無數梵王合掌恭敬，異口同音，皆<sup>7</sup>發是問，白佛言：「世尊！願使我等，於未來世，得見人中最大果報，三界眼目光明彌勒，普為眾生說大慈悲。」并八部眾，亦皆如此，恭敬叉手，勸請如來。

爾時，梵王與諸梵眾，異口同音，合掌讚歎，而說頌曰：

南無滿月 具足十力  
大精進將 勇猛無畏  
一切智人 超出三有  
成三達智 降伏四魔

<sup>7</sup> 大正藏：共

身為法器 心如虛空  
靜然不動 於有非有  
於無非無 達解空法  
世所讚歎 我等同心  
一時歸依 願轉法輪

爾時，世尊告舍利弗：「當為汝等，廣分別說。諦聽！諦聽！善思念之！汝等今者，以妙善心，欲問如來無上道業摩訶般若，如來明見，如觀掌中菴摩勒果。」

告舍利弗：「若於過去七佛所，得聞佛名，禮拜供養，以是因緣，淨除業障；復聞彌勒大慈根本，得清淨心。汝等今當一心合掌，歸依未來大慈悲者。我當為汝，廣分別說。彌勒佛國從於淨命，無諸諂偽，檀波羅蜜、尸<sup>8</sup>波羅蜜、般若波羅蜜，得不受不著。以微妙十願大莊嚴，得一切眾生起柔軟心，得見彌勒大慈所攝，生彼國土，調伏諸根，隨順佛化。」

「舍利弗，四大海水面，各減少三千由旬；時，閻浮提地縱廣正等十千由旬，其地平淨如琉璃鏡。大適意華、悅可意華、極大音<sup>9</sup>華、優曇

<sup>8</sup> 大正藏：尸羅；永樂北藏及龍藏：尸

<sup>9</sup> 大正藏：香

鉢花、大金果<sup>10</sup>華、七寶果<sup>11</sup>華、白銀果<sup>12</sup>華，華鬚柔輦，狀如天繒；生吉祥果，香味具足，輦如天繒<sup>13</sup>。叢林樹華，甘果美好<sup>14</sup>，極大茂盛，過於帝釋歡喜之園。其樹高顯，高三十里。城邑次比，雞飛相及，皆由今佛種大善根，行慈心報，俱生彼國。智慧威德，五欲眾具，快樂安隱，亦無寒熱風火等疾<sup>15</sup>，無九惱苦，壽命具足八萬四千歲，無有中夭，人身悉長一十六丈，日日常受極妙安樂，遊深禪定以為樂器。唯有三病：一者，飲食；二者，便利；三者，衰老。女人年五百歲，爾乃行嫁。

「有一大城，名翅頭末，縱廣一千二百由旬，高七由旬，七寶莊嚴，自然化生七寶樓閣，端嚴殊妙，莊校清淨。於窓牖間，列諸寶女，手中皆執真珠羅網，雜寶莊校，以覆其上，密懸寶鈴，聲如天樂。七寶行樹，樹間<sup>16</sup>渠泉，皆七寶成，流異色水，更相映發，交橫徐遊<sup>17</sup>，不相妨礙。其岸兩邊，純布金沙，街巷道陌，廣十二里，皆

<sup>10</sup> 大正藏：葉

<sup>11</sup> 大正藏：葉

<sup>12</sup> 大正藏：葉

<sup>13</sup> 大正藏：綿

<sup>14</sup> 大正藏：妙

<sup>15</sup> 大正藏：病

<sup>16</sup> 大正藏：間樹；永樂北藏及龍藏：樹間

<sup>17</sup> 大正藏：逝

悉<sup>18</sup>清淨，猶如天園，眾寶莊嚴<sup>19</sup>。

「有大龍王，名多羅尸棄，福德威力，皆悉具足，其池近城。龍王宮殿，如七寶樓，顯現于外，常於夜半化作人像，以吉祥瓶，盛香色水，灑淹塵土，其地潤澤，譬若<sup>20</sup>油塗，行人往來無有塵坌。

「是時，世人福德所致，巷陌處處有明珠柱，高十二里<sup>21</sup>，光踰<sup>22</sup>於日，四方各照八十由旬，純黃金色，其光照耀，晝夜無異，燈燭之明，猶若聚墨。香風時來，吹明珠柱，雨寶瓔珞，眾人皆用，服者自然如三禪樂。處處皆有金銀、珍寶、摩尼珠聚<sup>23</sup>，積用成山，寶山放光，普照城內，人民遇者，皆悉歡喜，發菩提心。

「有大夜叉神，名跋陀婆羅賒塞迦<sup>24</sup>，晝夜擁護翅頭末城及諸人民。灑掃清淨，設有便利，地裂受之，受已還合，生赤蓮華以蔽穢氣。

「時世人民，若年衰老，自然行詣山林樹下，安樂淡泊，念佛取盡，命終多生大梵天上及諸佛

<sup>18</sup> 大正藏：悉皆；永樂北藏及龍藏：皆悉

<sup>19</sup> 大正藏：掃灑清淨；永樂北藏及龍藏：眾寶莊嚴

<sup>20</sup> 大正藏：如

<sup>21</sup> 大正藏：明珠柱；永樂北藏及龍藏：明珠柱，高十二里

<sup>22</sup> 大正藏：喻

<sup>23</sup> 大正藏：等

<sup>24</sup> 大正藏：名跋陀婆羅賒塞迦（秦言善教）；永樂北藏及龍藏：名跋陀婆羅賒塞迦

前。

「其土安隱，無有怨賊劫竊之患，城邑聚落無閉門者，亦無衰惱、水火、刀兵及諸飢饉毒害之難。人常慈心，恭敬和順，調伏諸根，如子愛父，如母愛子，語言謙遜，皆由彌勒慈心訓導，持不殺戒、不噉肉故，以此因緣生彼國者，諸根淡<sup>25</sup>靜，面貌端正，威相具足，如天童子。

「復有八萬四千眾寶小城以為眷屬，翅頭末城最處其中。男女大小，雖遠若近，佛神力故，兩得相見，無所障礙。夜光摩尼如意珠華，遍滿世界，雨七寶花、鉢頭摩華、優鉢羅華、拘物頭華、分陀利華、曼陀羅華、摩訶曼陀羅花、曼殊沙花、摩訶曼殊沙華，彌布其地，或復風吹，迴旋空中。

「時，彼國界、城邑、聚落、園林浴池、泉河流注<sup>26</sup>，自然而有八功德水；命命之鳥、鵝、鴨、鴛鴦、孔雀、鸚鵡、翡翠、舍利、美音、鳩鵲、羅耆婆闍婆、快見鳥等，出妙音聲；復有異類妙音之鳥，不可稱數，遊集林池。金色無垢淨光明華、無憂淨慧日光明華、鮮白七日香華、瞻

<sup>25</sup> 大正藏：恬

<sup>26</sup> 大正藏：沼

葡萄六色香華，百千萬種水陸生華，青色青光、黃色黃光、赤色赤光、白色白光，香淨無比，晝夜常生，終無萎時。有如意果樹，香美無比，充滿國界。香樹金光生寶山間，充滿國界，出適意香，普熏一切。

「爾時，閻浮提中常有好香，譬如<sup>27</sup>香山。流水美好，味甘除患，雨澤隨時，天園成熟，香美稻種，天神力故，一種七穫，用功甚少，所收甚多，穀稼滋茂，無有草穢。眾生福德本事果報，入口消<sup>28</sup>化，百味具足，香美無比，氣力充實。

「其國爾時有轉輪聖王，名曰儻<sup>29</sup>佉。有四種兵，不以威武治四天下，具三十二大人相好。王有千子，勇猛端正，怨敵自伏。王有七寶：一、金輪寶，千輻轂輞皆悉具足。二、白象寶，白如雪山，七支<sup>30</sup>拄地，嚴顯可觀猶如山王。三、紺馬寶，朱鬣毛<sup>31</sup>尾，足下生華，七寶蹄甲。四、神珠寶，明顯可觀，長於三<sup>32</sup>肘，光明雨寶，適眾生願。五、玉女寶，顏色美妙，柔輦無骨。六、主藏臣，口中吐寶，足下雨寶，兩手出寶。七、

<sup>27</sup> 大正藏：若

<sup>28</sup> 大正藏：銷

<sup>29</sup> 大正藏：穰

<sup>30</sup> 大正藏：朕

<sup>31</sup> 大正藏：髦

<sup>32</sup> 大正藏：二

主兵臣，直<sup>33</sup>動身時，四兵如雲，從空而出。千子七寶，國界人民，一切相視不懷惡意，如母愛子。

「時，王千子各取珍寶，於正殿前作七寶臺，有三千<sup>34</sup>重，高十三由旬，千頭千輪，遊行自在。有四大寶藏，一一大藏，各有四億小藏圍繞。伊鉢多大藏，在乾陀羅國；般軸迦大藏，在彌提<sup>35</sup>羅國；賓伽羅大藏，在須羅吒國；儻<sup>36</sup>佉大藏，在婆羅捺國古仙山處。此四大藏，自然開發顯大光明，縱廣正等一千由旬，滿中珍寶，各有四億小藏附之，有四大龍，各自守護。此四大藏及諸小藏，自然湧<sup>37</sup>出，形如蓮華，無央數人皆共往觀，是時，眾寶無守護者，眾人見之，心不貪著，棄之於地，猶如瓦石、草木、土塊。時人見者，心生厭離，各各相謂而作是言：『如佛所說，往昔眾生為此寶故，共相殘害，更相偷劫、欺誑、妄語，令生死罪<sup>38</sup>，展轉增長，墮大地獄。』翹頭末城，眾寶羅網彌覆其上，寶鈴莊嚴，微風吹動，其音和雅，如扣鐘磬，演說歸依佛、歸依法、歸

<sup>33</sup> 大正藏：宜

<sup>34</sup> 大正藏：十

<sup>35</sup> 大正藏：緹

<sup>36</sup> 大正藏：穰

<sup>37</sup> 大正藏：踊

<sup>38</sup> 大正藏：死苦緣；永樂北藏及龍藏：死罪

依僧。

「時，城中有大婆羅門主，名修梵摩；婆羅門女，名梵摩拔提，心性柔<sup>39</sup>弱，彌勒託生，以為父母。雖處胞胎，如遊天宮，放大光明，塵垢不障，身紫金色，具三十二大丈夫相，坐寶蓮華，眾生視之，無有厭足，光明晃耀，不可勝計<sup>40</sup>，諸天世人所未曾覩；身力無量，一一節力，普勝一切大力龍象；不可思議毛孔光明，照耀無量，無有障礙；日月、星宿、水火珠光，皆悉不現，猶如埃塵。身長釋迦牟尼佛八十肘<sup>三十二丈</sup>，胷廣二十五肘<sup>十丈</sup>，面長十二肘半<sup>五丈</sup>，鼻高修直，當于面門，身相具足，端正無比，成就相好，一一相，八萬四千好以自莊嚴，如鑄金像；一一好中，流出光明，照千由旬；肉眼清徹，青白分明；常光繞身，面百由旬。日月星辰<sup>41</sup>、真珠摩尼、七寶行樹皆悉明耀，現於佛光，其餘眾光，不復為用，佛身高顯如黃金山，見者自然脫三惡趣。

「爾時，彌勒諦觀世間五欲過患，眾生受苦，沈沒長流，在大生死，甚可憐愍，自以如是正念，觀察苦、空、無常，不樂在家，厭家迫迮，猶如

<sup>39</sup> 大正藏：和

<sup>40</sup> 大正藏：視

<sup>41</sup> 大正藏：宿

牢獄。

「時，僂<sup>42</sup>佉王共諸大臣、國土人民，持七寶臺，有千寶帳及千寶軒、千億寶鈴、千億寶旛、寶器千口、寶甕千口，奉上彌勒。彌勒受已，施諸婆羅門；婆羅門受已，即便毀壞，各共分之。諸婆羅門觀見彌勒能作大施，生<sup>43</sup>奇特心。彌勒菩薩見此寶臺須臾無常，知有為法皆悉磨滅，修無常想，讚過去佛清涼甘露無常之偈：

諸行無常 是生滅法  
生滅滅已 寂滅為樂

「說此偈已，出家學道，坐於金剛莊嚴道場，龍花菩提樹下。枝如寶龍，吐百寶華，一一花葉作七寶色，色色異果，適眾生意，天上人間為無有比，樹高五十由旬，枝葉四布放大光明。

「爾時，彌勒與八萬四千婆羅門俱詣道場，彌勒即自剃髮出家學道，早起出家，即於是日初夜，降四種魔，成阿耨多羅三藐三菩提，即說偈言：

久念眾生苦 欲拔無由脫  
今者證菩提 豁然無所有<sup>44</sup>

<sup>42</sup> 大正藏：僂

<sup>43</sup> 大正藏：生大；永樂北藏及龍藏：生

<sup>44</sup> 大正藏：霍然無所礙；永樂北藏及龍藏：豁然無所有

亦達眾生空 本性相如實  
永更無憂苦 慈悲亦無緣  
本為救汝等 國城及頭目  
妻子與手足 施人無有數  
今始得解脫 無上大寂滅  
當為汝等說 廣開甘露道  
如是大果報 皆從施戒慧  
六種大忍生 亦從大慈悲  
無染功德得

「說此偈已，默然而住。時，諸天、龍、鬼神王不現其身，而雨天花供養於佛。三千大千世界六變震動，佛身出光，照無量國<sup>45</sup>，應可度者，皆得見佛。

「爾時，釋提桓因、護世天王、大梵天王、無數天子，於花林園，頭面禮足，合掌勸請轉於法輪。

「時，彌勒佛默然受請，告梵王言：『我於長夜受大苦惱，修行六度，始於今日，法海滿足<sup>46</sup>，建法幢、擊法鼓、吹法螺<sup>47</sup>、雨法雨，正爾當為汝等說法。諸佛所轉八聖道輪，諸天世人無能

<sup>45</sup> 大正藏：於無量；永樂北藏及龍藏：無量國

<sup>46</sup> 大正藏：滿；永樂北藏及龍藏：滿足

<sup>47</sup> 大正藏：蠡

轉者；其義平等直至無上，無為寂滅，為諸眾生斷長夜苦；此法甚深，難得難入，難信難解，一切世間無能知者，無能見者，洗除心垢，得萬梵行。』說是語時，復有他方無數百千萬億天子、天女、大梵天王，乘天宮殿，持天花香，奉獻如來，繞百千匝，五體投地，合掌勸請；諸天妓樂，不鼓自鳴。時，諸梵王異口同音<sup>48</sup>，而說偈言：

|                     |       |
|---------------------|-------|
| 無量無數歲               | 空過無有佛 |
| 眾生墮惡道               | 世間眼目滅 |
| 三惡道增廣               | 諸天路永絕 |
| 今日佛興世               | 三惡道殄滅 |
| 增長天人眾               | 願開甘露門 |
| 令眾心無著               | 疾疾得涅槃 |
| 我等諸梵王               | 聞佛出世間 |
| 今者得值遇 <sup>49</sup> | 無上大法王 |
| 梵天宮殿盛               | 身光亦明顯 |
| 普為十方眾               | 勸請大導師 |
| 唯願開甘露               | 轉無上法輪 |

「說此偈已，頭面作禮，復更合掌，慇懃三請：『唯願世尊，轉於甚深微妙法輪，為拔眾生

<sup>48</sup> 大正藏：聲

<sup>49</sup> 大正藏：佛

苦惱根本<sup>50</sup>，遠離三毒，破四惡道不善之業。』

「爾時，世尊為諸梵王，即便微笑，出五色光，默然許之。時，諸天子無數大眾，聞佛許可，歡喜無量，遍體踊躍，譬如孝子新喪慈父，忽然還活，大眾歡喜，亦復如是。時，諸大<sup>51</sup>眾右繞世尊，經無數匝，敬愛無厭，却住一面。

「爾時，大眾皆作是念：『設復千萬億<sup>52</sup>歲受五欲樂，不能得免三惡道苦，妻子財產所不能救。世間無常，命難久保，我等今者，於佛法中，淨修梵行。』作是念已，復更念言：『設受五欲經無數劫，如無想天壽無量億歲，與諸婁女共相娛樂，受細滑觸，會歸磨滅，墮三惡道，受無量苦，所樂無幾，猶如幻化，蓋不足言，入地獄時，大火炯<sup>53</sup>然，百億萬劫受無量苦，求脫回得？如此長夜，苦厄難拔，今日遇佛，宜勤精進。』

「時，穰<sup>54</sup>佉王高聲唱言：

設復生天樂 會亦歸磨滅  
不久墮地獄 猶如猛火聚  
我等宜時速 出家學佛道

<sup>50</sup> 大正藏：栽

<sup>51</sup> 大正藏：天

<sup>52</sup> 大正藏：雖復千億；永樂北藏及龍藏：設復千萬億

<sup>53</sup> 大正藏：洞

<sup>54</sup> 大正藏：穰

「說是語已，時，僊<sup>55</sup>佉王與八萬四千大臣恭敬圍繞，及四天王送轉輪王，至花林園龍花樹下，詣彌勒佛求索出家，為佛作禮，未舉頭頃，鬚髮自落，袈裟著體<sup>56</sup>，便成沙門。

「時，彌勒佛共僊<sup>57</sup>佉王，與八萬四千大臣、比丘僧<sup>58</sup>等，恭敬圍繞，并與無數天龍八部，入翅頭末城。足躡門闥，娑婆世界六種震動，閻浮提地化為金色，翅頭末大城中央，其地金剛，有過去諸佛所坐金剛寶座，自然湧<sup>59</sup>出眾寶行樹。天於空中雨大寶華，龍王作眾妓樂，口中吐華，毛孔雨華，用供養佛。佛於此座轉正法輪，謂是苦，苦聖諦，謂是集，集聖諦，謂是滅，滅聖諦，謂是道，道聖諦。并為演說三十七品助菩提法，亦為宣說十二因緣：無明緣行、行緣識、識緣名色、名色緣六入、六入緣觸、觸緣受、受緣愛、愛緣取、取緣有、有緣生、生緣老死憂悲苦惱等。

「爾時，大地六種震動，如此梵<sup>60</sup>聲聞于三千大千世界，復過是數無量無邊，下至阿鼻地獄，上至阿迦膩吒天。

<sup>55</sup> 大正藏：穰

<sup>56</sup> 大正藏：身

<sup>57</sup> 大正藏：穰

<sup>58</sup> 大正藏：諸比丘；永樂北藏及龍藏：比丘僧

<sup>59</sup> 大正藏：踊

<sup>60</sup> 大正藏：音

「時，四天王各各將領無數鬼神，高聲唱言：『佛日出世<sup>61</sup>，降霆甘露<sup>62</sup>，世間眼目，今者始開。』普令天<sup>63</sup>地一切八部，於佛有緣，皆得聞知。三十三天、夜摩天、兜率陀天、化樂天、他化自在天，乃至大梵天，各各於己所統領處，高聲唱言：『佛日出世，降霆<sup>64</sup>甘露，世間眼目，今者始開。』有緣之者，皆悉聞知。

「時，諸龍王八部、山神、樹神、藥草神、水神、風神、火神、地神、城池神、屋宅神等，踊躍歡喜，高聲唱言。

「復有八萬四千諸婆羅門，聰明大智，於佛法中亦隨大王出家學道。復有長者名須達那，今須達長者是，亦與八萬四千人俱共出家。復有利<sup>65</sup>師達多、富蘭那兄弟，亦與八萬四千人俱共出家。復有二大臣：一名梵檀朱<sup>66</sup>利、二名須曼那，王所愛重，亦與八萬四千人俱，於佛法中出家學道。轉輪王寶女名舍彌婆帝，今之毗舍佉母是也，與<sup>67</sup>八萬四千婁女俱共出家。儂佉王<sup>68</sup>太子名天金

<sup>61</sup> 大正藏：時

<sup>62</sup> 大正藏：法雨露；永樂北藏及龍藏：霆甘露

<sup>63</sup> 大正藏：大

<sup>64</sup> 大正藏：注

<sup>65</sup> 大正藏：梨

<sup>66</sup> 大正藏：末

<sup>67</sup> 大正藏：亦與；永樂北藏及龍藏：與

<sup>68</sup> 大正藏：穰佉；永樂北藏及龍藏：儂佉王

色，今提婆婆那長者子是，亦與八萬四千人俱共出家。彌勒佛親族婆羅門子名須摩提，利根智慧，今鬱多羅善賢比丘尼子是，亦與八萬四千人俱<sup>69</sup>，於佛法中俱共出家。穰<sup>70</sup>佉王千子，唯留一人用嗣王位，餘九百九十九人，亦與八萬四千人，於佛法中俱共出家。如是等無量億眾，見世苦惱，五陰熾然，皆於彌勒佛法中俱共出家。

「爾時，彌勒佛以大慈心，語諸大眾言：『汝等今者，不以生天樂故，亦復不為今世樂故，來至我所，但為涅槃常樂因緣，是諸人等，皆於佛法中，種諸善根。釋迦牟尼佛出五濁世，種種呵責為汝說法，無奈汝何，教植<sup>71</sup>來緣，令<sup>72</sup>得見我，我今攝受是諸人等，或以讀誦分別決定修多羅、毗尼、阿毗曇，為他演說，讚歎義味，不生嫉妬，教於他人，令得受持，修諸功德，來生我所；或以衣食施人、持戒、智慧，修此功德來生我所；或以妓樂、旛蓋、華香燈明供養於佛，修此功德來生我所；或以施僧常食、起立僧坊<sup>73</sup>、四事供養，持八戒齋，修習慈心，行此功德來生我所；

<sup>69</sup> 大正藏：六萬人；永樂北藏及龍藏：八萬四千人

<sup>70</sup> 大正藏：穰

<sup>71</sup> 大正藏：殖

<sup>72</sup> 大正藏：今

<sup>73</sup> 大正藏：房

或為苦惱眾生深生慈悲，以身代苦<sup>74</sup>，令其得樂，修此功德來生我所；或以持戒、忍辱，修清淨<sup>75</sup>慈心，以此功德來生我所；或造僧祇四方無礙、齋講設會、供養飯食，修此功德來生我所；或以持戒、多聞、修行禪定無漏智慧，以此功德來生我所；或有起塔供養舍利，念佛法身，以此功德來生我所；或有窮<sup>76</sup>困、貧窮、孤獨，繫屬於他，王法所加，臨當刑戮，作八難業，受大苦惱，救<sup>77</sup>濟彼等，令得解脫，修此功德來生我所；或有恩愛別離，朋黨爭訟，極大苦惱，以方便力，令得和合，修此功德來生我所。』

「說是語已，稱讚釋迦牟尼佛：『善哉！善哉！能於五濁惡世，教化如是等百千萬億諸惡眾生，令修善本，來生我所。』時，彌勒佛如是三稱讚釋迦牟尼佛，而說偈言：

|         |                        |
|---------|------------------------|
| 忍辱勇猛大導師 | 能於五濁不善世                |
| 教化成熟惡眾生 | 令彼修行得見佛                |
| 荷負眾生受大苦 | 令 <sup>78</sup> 入常樂無為處 |
| 教彼弟子來我所 | 我今為汝說四諦                |

<sup>74</sup> 大正藏：受

<sup>75</sup> 大正藏：淨；永樂北藏及龍藏：清淨

<sup>76</sup> 大正藏：厄

<sup>77</sup> 大正藏：拔

<sup>78</sup> 大正藏：今

亦說三十七菩提 莊嚴涅槃十二緣  
汝等宜當觀無為 入於空寂本無處

「說此偈已，復更讚歎：『彼時眾生，於苦惡世，能為難事；貪欲、瞋恚、愚癡、迷惑、短命人中，能修持戒，作諸功德，甚為希有。爾時，眾生不識父母、沙門、婆羅門，不知道法，互相惱害，近刀兵劫；深著五欲，嫉妬諂曲<sup>79</sup>，佞<sup>80</sup>濁邪偽，無憐愍心，更相殺害，食肉飲血；不敬師長，不識善友，不知恩<sup>81</sup>報恩；生五濁世，不知慚愧；晝夜六時，相續作惡，不知厭足，純造不善，五逆惡聚，魚鱗相咀<sup>82</sup>；求不知厭，九親諸族不能相濟。善哉！善哉！釋迦牟尼佛！以大方便，深厚慈悲，能於苦惱眾生之中，和顏美色，善巧智慧，說誠實語，示我當來，度脫汝等。如是導師明利智慧，世間希有，甚為難遇，深心憐愍惡事<sup>83</sup>眾生，為拔苦惱，令得安樂<sup>84</sup>，入第一義甚深法性。釋迦牟尼佛<sup>85</sup>三阿僧祇劫，為汝等故，修行難行苦行，以頭布施，割截耳鼻、手足、支

<sup>79</sup> 大正藏：佞；永樂北藏及龍藏：曲

<sup>80</sup> 大正藏：曲；永樂北藏及龍藏：佞

<sup>81</sup> 大正藏：知；永樂北藏及龍藏：知恩

<sup>82</sup> 大正藏：次

<sup>83</sup> 大正藏：世

<sup>84</sup> 大正藏：隱

<sup>85</sup> 大正藏：釋迦牟尼；永樂北藏及龍藏：釋迦牟尼佛

<sup>86</sup>體，受諸苦惱，為八正<sup>87</sup>道，平等解脫，利汝等故。』

「時，彌勒佛如是開導，安慰無量諸眾生等，令其歡喜。彼時眾生，身純是法，心純是法，口常說法，福德智慧之人充滿其中，天人恭敬，信受渴仰。時，大導師各欲令彼聞於往昔苦惱之事，復作是念：『五欲不淨，眾苦之本。』又能除捨憂感愁恨，知苦樂法皆是無常，為說：『色、受、想、行、識，苦、空、無常、無我。』說是語時，九十六億人不受諸法，漏盡意解，得阿羅漢，三明六通，具八解脫。三十六萬天子、二十萬天女，發阿耨多羅三藐三菩提心。天龍八部中，有得須陀洹者、種辟支佛道因緣者、發無上道心者，數甚眾多不可稱計。

「時<sup>88</sup>，彌勒佛與九十六億大比丘眾，并僊<sup>89</sup>佉王八萬四千大臣、比丘、眷屬圍繞，如月天子，諸星隨<sup>90</sup>從，步出<sup>91</sup>翅頭末城，還花林園重閣講堂。時，閻浮提城邑聚落，小王長者及諸四姓，皆悉來集龍花樹下花林園中。

<sup>86</sup> 大正藏：朕

<sup>87</sup> 大正藏：聖

<sup>88</sup> 大正藏：爾時；永樂北藏及龍藏：時

<sup>89</sup> 大正藏：穰

<sup>90</sup> 大正藏：宿；永樂北藏及龍藏：隨

<sup>91</sup> 大正藏：出；永樂北藏及龍藏：步出

「爾時，世尊重說四諦、十二因緣，九十四億人得阿羅漢；他方諸天及八部眾六十四億恒河沙人，發阿耨多羅三藐三菩提心，住不退轉。

「第三大會，九十二億人得阿羅漢；三十四億天龍八部發三菩提心。

「時，彌勒佛說四聖諦深妙法輪，度天人已，將諸聲聞弟子、天龍八部一切大眾，入城乞食，無量淨居天眾恭敬從佛入翅頭末<sup>92</sup>城。當入城時，佛現十八種神足，身下出水，如摩尼珠，化成光臺，照十方界；身上出火，如須彌山，流出<sup>93</sup>金光；現火<sup>94</sup>滿空，化成琉璃；大復現小，如芥子許，泯然不現；於十方踊，於十方沒，令一切人皆如佛身。種種神力，無量變現，令有緣者皆得解脫。

「釋提桓因三十二輔臣與欲界諸天，梵天王與色界諸天，并餘<sup>95</sup>天子天女，脫天瓔珞及以天衣而散佛上。時，諸天衣化成花蓋，諸天妓樂不鼓自鳴，歌詠佛德，密雨天花、栴檀雜香供養於佛，街巷道陌豎諸旛蓋<sup>96</sup>，燒眾<sup>97</sup>名香其煙若雲。

<sup>92</sup> 大正藏：未

<sup>93</sup> 大正藏：紫

<sup>94</sup> 大正藏：大

<sup>95</sup> 大正藏：并；永樂北藏及龍藏：并餘

<sup>96</sup> 大正藏：幢幡；永樂北藏及龍藏：旛蓋

<sup>97</sup> 大正藏：諸

世尊入城時，大梵天王、釋提桓因，合掌恭敬，以偈讚佛：

正遍知者兩足尊 天人世間無與等  
十力世尊甚希有 無上最勝良福田  
其供養者生天上 未來解脫住涅槃  
稽首無比<sup>98</sup>大精進 稽首慈悲<sup>99</sup>大導師

「東方天王提頭賴吒、南方天王毗留<sup>100</sup>勒叉、西方天王毗婁<sup>101</sup>博叉、北方天王毗沙門王，與其眷屬恭敬合掌，以清淨心讚歎世尊：

三界無有比 大悲自莊嚴  
體解第一義 不見眾生性  
及與諸法相 同入空寂性  
善住無所有 雖行大精進  
無為無足跡 我今稽首禮  
慈心大導師 眾生不見佛  
長夜受生死 墜墮三惡道  
及作女人身 今日佛興世  
拔苦施安樂 三惡道已少  
女人無諂曲 皆當得止息  
具足大涅槃 大悲濟苦者

<sup>98</sup> 大正藏：上

<sup>99</sup> 大正藏：心

<sup>100</sup> 大正藏：樓

<sup>101</sup> 大正藏：留

施樂故出世 本為菩薩時  
常施一切樂 不殺不惱他  
忍心如大地 我今稽首禮  
忍辱大導師 我今稽首禮  
慈悲大丈夫 自免生死苦  
能拔眾生厄 如火生蓮花  
世間無有比

「爾時，魔王於初夜、後夜，覺諸天人民，作如是言：『汝等既得人身，俱遇好時，不應竟夜睡眠覆心。汝等若坐若立當勤精進，正念諦觀五陰無常、苦、空、無我。汝等勿為放逸，不行佛教，若起惡業，後必致悔。』時，街巷男女皆効此語，言：『汝等勿為放逸，不行佛教，若起惡業，後必有悔。常勤方便，精進求道。莫失法利而徒生徒死。如是大師拔苦惱者，甚為難遇。堅固精進，當得常樂涅槃。』<sup>102</sup>

「爾時，世尊次第乞食，將諸比丘還至本處，入深禪定，七日七夜寂然不動。彌勒<sup>103</sup>弟子色如天色，普皆端正，厭生老病死，多聞廣學，守護法藏，行於禪定，得離諸欲，如鳥出殼。

<sup>102</sup> 大正藏無「爾時，魔王於初夜、後夜」至「當得常樂涅槃」段經文

<sup>103</sup> 大正藏：彌勒佛；永樂北藏及龍藏：彌勒

「爾時，釋提桓因與欲界諸天子，歡喜踊躍，復說偈言：

世間所歸大導師 慧眼明淨見十方  
智力功德勝諸天 名義具足福眾生  
願為我等群萌類 將諸弟子詣彼山  
供養無惱釋迦師 頭陀第一大弟子  
我等應得見過佛 所著袈裟聞遺法  
懺悔前身濁惡劫 不善惡業得清淨

「爾時，彌勒佛與娑婆世界前身剛強眾生及諸大弟子，俱往耆闍崛山。到山下已，安詳徐步，登狼跡山。到山頂已，舉足大指躡於山根，是時，大地十八相動。既至山頂，彌勒以手兩向擘山，如轉輪王開大城門。

「爾時，梵王持天香油灌摩訶迦葉頂，油灌身已，擊大槌椎，吹大法螺<sup>104</sup>。摩訶迦葉即從滅盡定覺，齊整衣服，偏袒右肩，右膝著地，長跪合掌，持釋迦牟尼佛僧伽梨，授與彌勒而作是言：『大師釋迦牟尼多陀阿伽度、阿羅訶、三藐三佛陀，臨涅槃時，以此法衣付囑於我，令奉世尊。』

「時，諸大眾各白佛言：『云何今日此山頂上有人頭蟲，短小醜陋，著沙門服，而能禮拜恭

<sup>104</sup> 大正藏：蠡

敬世尊？』

「時，彌勒佛訶諸大眾<sup>105</sup>，莫輕此人，而說偈言：

|       |       |
|-------|-------|
| 孔雀有好色 | 鷹鷂鷄所食 |
| 白象無量力 | 師子子雖小 |
| 撮食如塵土 | 大龍身無量 |
| 金翅鳥所搏 | 人身雖長大 |
| 肥白端正好 | 七寶瓶盛糞 |
| 污穢不可堪 | 此人雖短小 |
| 智慧如鍊金 | 煩惱習久盡 |
| 生死苦無餘 | 護法故住此 |
| 常行頭陀事 | 天人中最勝 |
| 苦行無與等 | 牟尼兩足尊 |
| 遣來至我所 | 汝等當一心 |
| 合掌恭敬禮 |       |

「說是偈已，告諸比丘：『釋迦牟尼世尊於五濁惡世教化眾生，千二百五十弟子中，頭陀第一，身體金色，捨金色婦，出家學道，晝夜精進，如救頭然，慈愍貧苦下賤眾生，恒福度之，為法住世，摩訶迦葉者，此人是也。』說此語已，一切大眾悉為作禮。

<sup>105</sup> 大正藏：弟子；永樂北藏及龍藏：眾

「爾時，彌勒持釋迦牟尼佛僧伽梨，覆右手不遍纔掩兩指，復覆左手亦掩兩指；諸人怪歎：『先佛卑小，皆由眾生貪濁憍慢之所致耳。』告摩訶迦葉言：『汝可現神足，并說先佛所有經法。』」

「爾時，摩訶迦葉踊身虛空，作十八變，或現大身滿虛空中；大復現小如葶藶子，小復現大；身上出水，身下出火；履地如水，履水如地，坐卧空中，身不陷墜；東踊西沒，西踊東沒，南踊北沒，北踊南沒，邊踊中沒，中踊邊沒，上踊下沒，下踊上沒；於虛空中，化作琉璃窟；承佛神力，以梵音聲，說釋迦牟尼佛十二部經。大眾聞已，怪未曾有。八十億人遠塵離垢，於諸法中不受諸法，得阿羅漢；無數天人發菩提心，繞佛三匝，還從空下，為佛作禮，說有為法皆悉無常。辭佛而退，還耆闍崛山，本所住處；身上出火，入般涅槃。收身舍利，山頂起塔。」

「彌勒佛歎言：『大迦葉比丘是釋迦牟尼佛於大眾中，常所讚歎頭陀第一，通達禪定解脫三昧，是人雖有大神通力<sup>106</sup>而無高心，能令眾生得大歡喜，常愍下賤貧苦眾生。』」

「彌勒佛歎大迦葉骨身言：『善哉！大神德！』」

<sup>106</sup> 大正藏：神力；永樂北藏及龍藏：神通力

釋師子大弟子大迦葉！於彼惡世能修其心。』

「爾時，摩訶迦葉骨身即說偈言：

頭陀是寶藏 持戒為甘露  
能行頭陀者 必至不死地  
持戒得生天 及與涅槃樂

「說此偈已，如琉璃水，還入塔中。」

「爾時，說法之處，廣八十由旬，長百由旬；其中人眾，若坐若立，若近若遠，各自<sup>107</sup>見佛在於<sup>108</sup>其前獨為說法。

「彌勒佛住世六萬億歲，憐愍眾生故，令得法眼；滅度之後，諸天世人，闍維佛身。時，轉輪王收取舍利，於四天下，各起八萬四千塔；正法住世六萬歲，像法亦六<sup>109</sup>萬歲。汝等宜應各勤<sup>110</sup>精進，發清淨心，起諸善業，得見世間燈明彌勒佛身必無疑也。」

佛說是語<sup>111</sup>已，尊者舍利弗、尊者阿難，即從座起，為佛作禮，胡跪合掌，白佛言：「世尊！當何名斯經？云何奉持<sup>112</sup>？」

佛告阿難：「汝好憶持，普為天人分別演說，

<sup>107</sup> 大正藏：各；永樂北藏及龍藏：各自

<sup>108</sup> 大正藏：在；永樂北藏及龍藏：在於

<sup>109</sup> 大正藏：二；永樂北藏及龍藏：亦六

<sup>110</sup> 大正藏：勤加；永樂北藏及龍藏：各勤

<sup>111</sup> 大正藏：語；永樂北藏及龍藏：是語

<sup>112</sup> 大正藏：奉持之；永樂北藏及龍藏：奉持

莫作最後斷法之人<sup>113</sup>。此法之要，名一切眾生斷五逆罪<sup>114</sup>，淨除業障、報障、煩惱障，修習慈心與彌勒共行，如是受持；亦名一切眾生得聞彌勒佛名，必免五濁世，不墮惡道經，如是受持；亦名破惡口業，心如蓮花，定見彌勒佛經，如是受持；亦名慈心不殺、不食肉經，如是受持；亦名釋迦牟尼佛以衣為信經，如是受持；亦名若有聞佛名者<sup>115</sup>，決定得免八難經，如是受持；亦名彌勒成佛經，如是受持。」

佛告舍利弗：「我<sup>116</sup>滅度後，比丘、比丘尼、優婆塞、優婆夷、天龍八部鬼神等，得聞此經，受持、讀誦、禮拜、供養，恭敬法師，破一切業障、報障、煩惱障，得見彌勒及賢劫千佛，三種菩提隨願成就，不受女人身，正見出家，得大解脫。」

說是語已，時諸大眾，聞佛所說，皆大歡喜，禮佛而退。

佛说彌勒成佛經<sup>117</sup>

<sup>113</sup> 大正藏：人耶；永樂北藏及龍藏：之人

<sup>114</sup> 大正藏：種

<sup>115</sup> 大正藏：名；永樂北藏及龍藏：名者

<sup>116</sup> 大正藏：佛

<sup>117</sup> 大正藏：佛說彌勒大成佛經

## ● 結誦儀

### 補闕真言

(三編)

南無喝囉怛那. 哆囉夜耶. 佉囉佉囉. 俱住俱住.  
摩囉摩囉. 虎囉. 吽. 賀賀. 蘇怛那. 吽. 潑抹拏. 娑  
婆訶.

### 補闕圓滿真言

(三編)

唵. 呼嚧呼嚧. 社曳穆契. 莎訶

### 普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉  
嚩吽

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無當來下生彌勒佛 (合掌三稱)

南無護法諸天菩薩 (合掌三稱)

## 禮佛發願文

(一編)

歸命十方調御師 演揚清淨微妙法  
三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤。仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉痾；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

## 迴向偈

(一編)

願以此功德 普及於一切  
我等與眾生 皆共成佛道

## 三皈依

(一編)

自皈依佛，當願眾生，體解大道，發無上心；  
自皈依法，當願眾生，深入經藏，智慧如海；  
自皈依僧，當願眾生，統理大眾，一切無礙。和南聖眾。

南无护法韦驮尊天菩萨



此咒置经书中可减误跨之罪